



## INTRODUCZIUN

DA SER JAN-ANDREA BERNHARD

*L'emprema poetessa romontscha, Mengia Wieland-Bisaz da Scuol, ha scret 1756 en ina da sias poesias pietusas: «lesu havd'aint in meis cour / lesu tü est mia amur / lesu tü tot meis cuffort / lesu spendram dalla mort.» – Quels plaids meinan nus senza dubi alla lecziun dalla dumengia hodierna! La colligaziun cun Diu duei esser – tenor Mengia – in ligiom fetg persunal, in ligiom da carezia, in ligiom cun tgierp ed olma.*

*Per la pietad da Mengia vala il medem sco per quella da Moses: Niessegner ei buca lontans, mobein damaneivels per quels che teidlan siu plaid en lur mintgagi. Moses admonescha ch'in e scadin dueigi observar ses cumondaments e sias prescripziuns, e quei muort duas raschuns: D'ina vart dueigien nus sevolver tier nies bien Diu, da tut nies cor e da tut noss'olma, da l'autra vart dueigien nus dar plaz e dacasa a nies bien Diu, en nies cor ed en noss'olma. Beai quels che restan ligiai cun Niessegner e Salvader, en tut las tribulaziun, en tut disletg ed en tutta uiara. Gest las afflicziuns dad oz meinan nus tier ils plaids d Moses: «carezar nies bien Diu» cun cor ed olma – aschia savein bandunar l'uiara ed arrivar en in mund plein pasch e plein perdunament.*

## 1. LECZIUN

*Dt 30,10–14*

Moses ha plidau cul pievel e detg:

Ti dueies tedlar la vusch dil Segner tiu Diu ed observar ils camonds e las prescripziuns ch'ei messas per scret el cudisch da questa lescha. E ti dueies sevolver tier il Segner tiu Diu da tut tui cor e da tut ti'olma. Quest tschentament che jeu dun oz a ti, ei buca memia grevs per tei e buca memia lontans. El ei buca sin tschiel, che ti savesses dir: Tgi ascenda sin tschiel per purtar el a nus e far da saver el, sinaquei che nus observeien el? El ei era buca videifer la mar, che ti savesses dir: Tgi va per nus sur mar per purtar el a nus e far da saver el, sinaquei che nus observeien el? Na, il plaid ei fetg damaneivel, en tia bucca ed en tui cor, aschia che ti sas observar el.